

## **Стихиры Сретения Господня на «Господи, воззвах», глас 1:**

**Да будут уши Твои // внимлюще гласу моления моего.**

Глаголи, Симеоне, / Кого нося на руку в церкви радуешься? / Кому зовещи и вопиещи: / ныне свободихся, видех бо Спаса моего? / Сей есть от Девы рождейся, / Сей есть от Бога Бог Слово, / воплотивыйся нас ради и спасый человека, // Тому поклонимся.

**Аще беззакония назриши, Господи, Господи, кто постоит? / /Яко у Тебе очищение есть.**

Приими, Симеоне, Егоже под мраком Моисей / законополагающа провиде в Синаи, / Младенца бывша, закону повинующася. / Сей есть законом глаголавый, / Сей есть во пророцех реченный, / воплотивыйся нас ради и спасый человека, // Тому поклонимся.

**Имене ради Твоего потерпех Тя, Господи, потерпе душа моя в слово Твое, // упова душа моя на Господа.**

Приидем и мы, песньми Божественными Христа устрящем / и примем Его, / Егоже спасение Симеон виде. / Сей есть, Егоже Давид провозвести, / Сей есть во пророцех глаголавый, / воплотивыйся нас ради и законом вещавый, //Тому поклонимся.

**Слава, и ныне, глас 6:**

Да отверзется дверь Небесная днесь: / Безначальное бо Слово Отчее, / начало приим под леты, / не отступль Своего Божества, / от Девы, яко Младенец четыредесятидневен / Материю вольне приносится в церковь законную, / и Сего на руки приемлет старец, / отпусти, зовый, раба, Владыко, / ибо очи мои видеста спасение Твое. / Пришедый в мир спасти род человекъ, // Господи, слава Тебе.